

Wednesday, February 18, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

CM

Chief Minister Pu Lalduhoma'n ZPM-a inpe te chauhin sawhthing an hralh thei nia sawina lehkha chu thudik a nih chuan a tul angin hma an la nghal dawn a, phuahchawp a nih chuan an bawhzui nghal dawn tih a sawi.

Vawiina Assembly thutkhawma East Tuipui bialtu Pu Ramthanmawia'n a bial chhunga khaw pathumah sawhthing chingtute'n Society a inziahlul mai ni lovin, ZPM membership fee an pek loh leh in lawm luh ni a an din loh chuan ZPM sorkarin a leisak dawn lo tih sawi a awm tih sawiin, a lehkha pawh a neih thu a sawi a, hei hi ZPM kaihhruai sorkar chuan a hriatpui em tih zawhna a zawt a. Agricultur Minister Pu PC Vanlalruata chuan he thil thleng hi ZPM kaihhruai sorkar chuan a hriatpui loh thu a sawi a, Hemi chungchang hi House Leader Pu Lalduhoma, CM pawhin chhangletin, he lehkha copy hi amah ngei pe turin a dil a, a dik a nih chuan a tul anga hma an lak tur thu leh, phuahchawp a nih chuan an bawhzui tur thu a sawi a ni.



SOCIAL WELFARE MINISTER

Social Welfare Minister Pi Lalrinpui'n Mizoram sum leh pai dinhmunin a zir loh avangin Sethawna Jordan Centre chu Synod hnena hlan turin sorkar a inpeih fel tawh tih a sawi.

He thu hi vawiina Assembly thutkhawma zawhna leh chhanna hunah sawiin, Minister Pi Lalrinpui chuan Sethawn-a Jordan Centre chu Synod hnenah hlan turin Sorkar a inpeih fel tawh a, Synod lam inpeih fel hunah hlan fel theih a ni a ti a, hemi atan hian Synod chuan an budget-ah cheng vaibelchhe 2 an dah tawh niin thu an dawng tih sawiin, inremna pawh buaipui fel tawh a ni a, Law & Judicial Department phalna nghah mek a nih thu a sawi bawk. Zawh belhna chhangin, Minister chuan Synod hnena Jordan Centre an hlan chhan chu Mizoram sum leh pai dinhmunin a zir loh avang leh sorkar anga hma an lak chuan sorkar hnathawh anga thawh a nih chuan tute pawh an thatchhe thin tih sawiin, hei vang hian kohhranin a enkawl a that ber an ring tih sawiin Synod an dawr hnuah lawm takin an la a, an inrem dan chuan kumtin Mizoram sorkar chuan Grant-in-Aid (GIA) cheng nuai 50 an pe thin dawn a, inremna a ral hunah tihpun leh zel theih turin an dah tih a sawi bawk a ni.

Social Welfare Minister Pi Lalrinpui chuan tun dinhmunah Mizoramah ruihhlo ngaite enkawl na hmun 50 chuang a awm tih sawiin, ZPM kaihhruai Mizoram Sorkar chu ruihhlo do ah a tang hle tih sawiin, tun dinhmunah Lungleng ramah Pu Federeick-a te enkawl turin ruihhlo enkawl na hmun liantham tak din tum a ni a ti a, a hnua inenkawl zui zelna (aftercare) te siamin, khawvel pum pawhin a hriat theih tura din an tum thu a sawi bawk a ni.



AGRICULTURE MINISTER

Agriculture Minister Pu PC Vanlalruata'n nikum 2025 chhunga sawhthing leina cheng vaibelchhe 4-5 chingpen nia sawi chu sum pek chhuah a nih hma-a hum hman a nih thu a sawi.

He thu hi vawiina Assembly thutkhawma zawhna leh chhanna hunah sawiin, Minister Pu PC Vanlalruata chuan sawhthing leina pawisa tih chingpen chungchangah nikum July thla khan thil fel lo a awm tih an hriat tawh thu sawiin, MAMB chuan Investigation Team dinin vawi 4 lai SCC hrang hrang leh an khaw tuamte tlawh chhuakin an feh chhuak a ti a, Farkawn, Khuangleng, Cold Storage New Champhai leh Ramhrangkawn SCC-a mi thenkhatin an sawhthing thar chhuah ni lo, hmun dang a mi, man tlawm zawka lei khawmin, SCC kaltlangin anmahni thar chhuah anga hralh an tum tih sawiin Portal-ah pawh an thun lut fel vek tawh tih an hre chhuak a ti a, a taka sum tih chingpen a awm hmain endikna kalpui nghal niin, sum pekchhuah a nih hma-a finfiah niin, data dik lo pawh siamthat a ni a ti a. Sum chingpen tur pawh hum hman a ni tih sawiin, sum chingpen a awm hman loh avangin tu chungah mah action lak a ni lo tih sawiin, hemi chungchangah hian nimin thleng khan complain lut chinfel loh a la awm avangin thil sual tih tum nia hriatte hming tarlan hi ala rem rih lo tih a sawi bawk a ni.

Agriculture Minister chuan tun thla February ni 2 atangin SCC 64 atanga sawhthing lei tan leh turin an buaipui mek a, SCC level-a sawhthing tender ve turin an in zirtir mek tih sawiin, Khuangleng SCC ah chuan sorkarin floor price a siam cheng 30 atanga cheng 35 inkarin an hralh chhuak mek a ti a, nikum 2025 chhung a sorkarinloneitu sawhthing leina bat sak a nei lo tih a sawi bawk.



AI IMPACT SUMMIT

AI Impact Summit 2026 a ni hnihna chu nimin khan sawrkar hnathawhnaa AI pawimawhna chungchang sawiho a ni. He session hi a thupuihah AI in Governance: Revolutionising Government Efficiency tih a ni a. Khawvel mithiam kalkhawmten sawrkar inrelbawlina kawnga AI tangkaina tur tam tak an sawiho a. Social Entrepreneur Dean Karlana'n Togo a sawrkarin mipui rawng abawlina kawnga machine learning hman dana zirbingna a neihte he hunah hian enho a ni a. AI hman tangkai anih avangin food security, rilru hriselna leh mipui nitin eibar zawinna leh khawtlang nunah a hma aia hlawk zawka thil tha a thlen dante tarlan a ni.

